

Efeso

Yaizéze ac.

¹ Anutuac ewa sinjiguc Kristo Yesuac Méliméli ic wawaña ni Paulonéñ Efeso ama areña yandaiguc kecanzu ic embac téréya ini zéma Kristo Yesuac qeriaiguc ic héla wamma ninzénjéma kecanzu onac muru kiwi yomi oénécmizua.

² Anutu Mañgocnina zéma Miñ Kewunina Yesu Kristo iorac murunec ewa hia zéma luaenéñ onac muru hemac.

Qeri uñawac mozocya.

³ Mepé qepési wammini! Miñ Kewunina Yesu Kristoac Mañgocya Anutunéñ Kristoac qeriaiguc qeri uñawac mozoc kurumenj igucnec hahaya hénia hénia mozocgé nénécmiyec.

⁴ Wañu eñeya kiwaiguc zéma eñeya ala sinjiguc, neñañ téréyanec zéma solañanec kecbiñ niñac, baec kurumenj ménda zéyu hicñiyecnec, Kristoac qeriaiguc gési nénécmiyec.

⁵ Gési nénécmima ewa hia nimma eñeya ewa sinjiguc becaru niñarenjéyu heyec séc, Yesu Kristonéñnec neñañ eñeya nambérac héra buña qenénécmiyec.

⁶ Imi mia siña nimmianzac Yesu iwac qeriaiguc, iwac ewa hia edamuyaguc imi neñañ muru boñtegic eñ nénécmiyec imi mepésimiwiñ niñac, imuhuc wañ nénécmiyec.

⁷ Kristo iwac qeriaiguc mia, ewa hiaya kuaya qeqeya imuac séhaiguc, sacyanén bon héré menénécmima késpedesicnina wai nénécmiyec.

⁸ Imi mia inén ninjegic qinjegic zéma nin asac asaria moczojnec nejan muru mesécgé nénécmiyec.

⁹ Imuhuc wamma ewa sinja sasangia, eneya ewa qeriaiguc ninarengeyu heyec imuac séciguc, ewa hiawac zéau nénécmiyu qerininanén ninzin.

¹⁰ Imi mia nalé ninjec imi ducnyu, iwawai kurumeniguc kekera zéma iwawai baeciguc kekera imi moczojn Kristoac qeriaiguc arenhéra tun momacguc wammac ninjac imuhuc wan nénécmiyec.

¹¹ Iwawai moczojn ewa sinja hezac séc wanjanzac Anutu iwac ewa sinj méndacma bec zétecgéyu heyec séciguc Kristoac qeriaiguc gési nénécmiyu iwac mératécac buja wamma kecanzin.

¹² Imi mia Kristoac qeriaiguc walac walac mambéc kerinjac kecanzin nenen imi kecma tetecgiaiguc iwac edamuyawac mepé qepési héra wambin ninjac imuhuc wan nénécmiyec.

¹³ Ini acguc iwac qeriaiguc ac héla, késpedes igucnec angén titiac buja suruc hiabia imi nimma ninzéngegic sisipac acwac Uja téréyanéjnec eneya bujawac asé kiwi meénécmiyec.

¹⁴ Wanu Uja Téréya iminén mia kurumenjac mératécnina imuac sisipac acwac asé kiwiya wanzac. Wanu ic embac elingé nénécmimia imi bon hérénina menénécmiyu eneya edamuya mepésimiwin ninjac imuhuc wan nénécmiyec.

Pauloac zéwelec ac.

¹⁵ Hénia imuac niṅac ini Miṅ Kewunina Yesuac qeriaiguc ninzén ninzénghina késakeczu imuac suruc zéma ala siṅghina ic embac téréya ionac waṅ énécmianzu imuac suruc imi ni acguc zégic nindari.

¹⁶ Imuac mia onac niṅ wamma ménda misi-manec ewa hia ac ézéma zéwelecanzua séc onac qacghina imi zéhicṅi mianzua.

¹⁷ Miṅghina Yesu Kristoac Anutu, maṅgocnina edamuyaguc inéṅ mia niṅtegic qinṅtegic zéma ackuažéc zéauaṅya imuac qeri uṅa imi énécmiyu Anutuac hénia séha nintegicmu niṅac zéwelec waṅanzua.

¹⁸ Waṅu ewa qeriginawac kiwa measari énécmiyu hénia némac niṅac unuruyu mambéc keczu imi zéma ic embac téréya sugghinaiguc mératéc edamuyaguc dimuhucya kuaya qeqeya késa keczu imi niṅyacghému.

¹⁹ Waṅu iwac kuc yandaya ogicqogira ninzén ninzén ic neṅaṅ muru ai meanzac iminéṅ kukuc duruc durucya eṅeṅa wanzac imi niṅtegicmu niṅac zéwelecanzua.

²⁰ Waṅu Anutuac kuc yanda iminéṅ Yesu humuc igucnec meqeliyec. Meqelima wagicma kurumenṅiguc emma eṅeya méra héiyaiguc oporec.

²¹ Opocma qara imi meyarū ic kewuya kewuya zéma qac buṅa zéma kuc buṅa zéma galéṅ buṅa zéma qacghina hénia hénia baec yomuac naléiguc hezac imi sac qahac, néṅ ama baec hahaya hémbénaṅaiguc hezac imi moczoṅ onogicdarec.

²² Waṅu iwawai moczoṅ imi hénia duandiaiguc haiyec. Haima Yesu imi iwawai moczoṅ onogicma héniorinṅ neṅaṅ orucnina wammac niṅac

oporec.

²³ Waᅇu h́naorin neᅇaᅇ imi iwac h́na ḿria* wamma kecziᅇ. Waᅇu h́naorin imi mia iwawai moczoᅇ imuac qeriaiguc iwawai moczoᅇ ścgé énécmianzac iwac howiacnec wanzinᅇ.

2

Humuc igucnec kekeciguc.

¹ Waᅇu ini wawaᅇ meme biria źma ḱpésicgina imuac qeriaiguc humugic meqeli énécmiyec.

² Becnec imi ini haka biria imuhucyawac qeriaiguc tacyac wamma baec yomuac haka silic źma Biria miᅇina kurumeᅇ bawa sawawac galenᅇ memec kuha ḱsa keczac imi méndacma kecaᅇgic. Waᅇu deguc ac qeᅇe ic ionac sugcinaiguc ai meanzac uᅇa biria iminéᅇ mia Biria miᅇina wanzac.

³ Becnec imi neᅇaᅇ imuhucyanec sugcinaiguc kecma séwininawac siᅇ tohoma kecma séwinina źma ewaninawac siᅇanéᅇ waᅇ nénécmiyec śc waᅇinᅇ. Imuac ic tosara iniguc h́nianina momacguc waᅇu qeri biriawac buᅇawac namb́rac h́ra kerinᅇ.

⁴ Anutu wésé nininᅇ kuneᅇ yanda hemiyu neᅇaᅇ ala siᅇ waᅇ nénécmima ala siᅇ yanda imuac niᅇac wamma

⁵ ḱpésic nina niᅇac humuyinᅇ neᅇaᅇ imi Kristo Yesuac qeriaiguc meqeli nénécmiyec. (Ini imi ewa hiaya niᅇac aᅇǵᅇnina tinénécmiyec.)

* **1:23:** Girik aciguc; Soma, neᅇaᅇ neᅇaᅇ aciguc séwiya.

⁶ Neñañ Yesuguc momacnec meqeli nénécmima Kristo Yesuac qeriaiguc kurumenaç kekeciguc i guc momacnec tacbiñ niñac nonoporec.

⁷ Imi mia Kristo Yesuac qeriaiguc wésé niniñ wañ nénécmima iwac ewa hiaya ogicqogira imi baec yomuac naléya hama emmac séc nénézéyu hémbiñ niñac imuhuc wañ nénécmiyec.

⁸ Ini imi ninzégégic ewa hiaya niñac aňgégina tiénécmiyec. Imuac niñac imi mia onac murunec qahac, néñ sese Anutuac murunec hahaya wanzac.

⁹ Imi mia wawañ memenina igucnec qahac, imuac ic embac méñnéñ méñ séwi eñeñ hia ménda wammac.

¹⁰ Neñañ imi Kristo Yesuac qeriaiguc ai solaña mewiñ niñac Anutunéñ menénécmiyec. Wañu ai imuhuc geñnec tima kembíñ niñac Anutunéñ becneç niñu heyec.

Kristoac qeriaiguc ewa momac wamma kecbiñ.

¹¹ Imuac niñac ini yomuhuc niñqelimu; Becnec ini séwi tasé herichericgina qahac ic enia kecañgic. Imuac niñac ic embac méraginanéñ séwi taségina hericma séwi tasé hericheric ginaguc zéénéc mimiawac kecañgic ienené onac niñ séwi tasé herichericgina qahac zéénéc miangic.

¹² Nalé imuaru ini imi Kristo qahac sénganjen kecañgic. Kecma Israelac héngalené ama arená yanda imuacnec elicgé énécmimia wamma eñacnec kecañgic. Wañu zikiziki acwac sisipac ac imuac mia ic embac méréra tanec kecma niñkinzégina qahac Anutugina qahac baeciguc kecañgic.

13 Wañu deguc imi becneç lakeç kecañgic ini Yesuac qeriaiguc Kristoac sacya niñac Anutuac muru hosuru énépésima onoporu kecañzu.

14 Kristo imi luaenina. Inéñ sucninaiguc demin elic elicgia nañec imi iwac séwiya aunénéc mima hézénégéyu mayu tuñ éréhécnéñ momacguc wañec.

15 Wañu tuñ éréhéç imi eñeya qeriaiguc séwi momacguc qeliawac wamma luaeiguc kecmu niñac eñeya séwiya wai nénécmima zézé seli ac zéma pakeñ ac zéma hénac ac hénia hénia imuhucya imi néhélima hazéc wamma kekeç imi audareç.

16 Wañu ic héñgeña wéndara iminéñnec tuñ éréhéç imi séwi momacguc wamma Anutuguc ewa momac wammu niñac imuac qahaiguc hazéc niniñ imi qeyu humuyec.

17 Wañu mama hama lakeç kecañgic ionac zéma hosuru kecaññ Yuda ic nonac momacneç luaeac buña neñañ muru zéau nénécmiyec.

18 Imi mia iwac qeriaiguc ini zéma nini neñawu Uña téreyawac qeriaiguc Mañgocac muru kerembññ niñac imuhuc wañ nénécmiyec.

19 Imuac deguc muarunec, ini imi ic méréra me ic kian qahac, néñ ic embac météré énécmimia i iniguc séc momac wamma Anutuac areñhéra zéma héñgaleñ ama areña yanda imuac buñahéra wamma keczu.

20 Ini imi Yesuac Méliméli ic zéma Anutuac tilinñ tilinñ ic ionac qambaña imuac qahaiguc kumu énécmimia. Kristo Yesu eñeyaoc imi ama imuac wañgoñaguc hoc qambaña wañecac keczac.

21 Iwac qahaiguc sécna sécga momacneç

toroqema enni ama imi moczoŋ Miŋ Kewuninawac qeriaiguc ocmuŋ téréya wamma yandima eŋanzac.

²² Ini acguc Uŋa téréyawac qeriaiguc ocmuŋ téréya Anutunéŋ tacyac wawaŋa wammac niŋ Yesuac qeriaiguc momacnec toroqe énécmiyu eŋanzac.

3

Paulonéŋ ic enia ionac niŋac wamma ai meyec.

¹ Waŋu Paulo ni ac zéma mazua hénia imuac niŋac ic enia onac niŋac wamma Kristo Yesuac hésa ic wamma kecanzua.

² Waŋu ama imuac welenŋ qeŋe ai imi Anutunéŋ onac niŋ wamma goi héihéiyawac niŋac wamma nuac néŋec imi ini hélacnec bec niŋgic gezaŋ.

³ Waŋu usuya auma ac saŋa imi nézéyu niŋasariyi suruc imuac imi bec zékaŋ zékaŋ wamma oénécmiyi.

⁴ Ini kiwi imi olommuiguc Kristoac hénia saŋa niŋtegiri imi ini acguc niŋtegicmu.

⁵ Ac saŋa imi deguc Yesuac méliméli ic téréya zéma Anutuac tiliŋ tiliŋ ic ionac muru Uŋa téréyanéŋ zéhicŋi énécmiyec ésécnec becaru imi hicŋisai nalé tosaraiguc imi ic onac naŋhéra méŋac méŋ imuhuc ménda zéhicŋi énécmiyu niŋgic.

⁶ Imi mia ic enia eneŋ buŋa suruc hiabia imuaru toroqema Kristo Yesuac qeriaiguc sisipac acya imi momacnec mératéc mema neŋawu momacnec séwi momacguc wamma kecziŋ.

⁷ Wañu Anutuac goi héihéia niñac ai memeac sese mihicñi néñu, imuac kuhanéñ nuaru ai meanzac séciguc buña suruc hiabia imuac ai icya wamma keczua.

⁸ Buña suruc hiabia, Kristoac mériañ yanda oloñ oloñawac séc qahac imi ic enia énézéman niñac ic embac téréya ionac sugginaiguc mageqeya téngéñ tosara onogicma mamaya kecañzua nidac imuhucyawac goi héihéiyawac buña qenéñec.

⁹ Imi mia iwawai moczoñ zéhicñiyec Anutu iwac qeriaiguc nalé hénihénia qahac imuarunec musañ musañgiawac niñu heyec ai areña imuac héla imi dimuhucya wanzac imi zéasari énécmiman niñac imuhuc wannéñec.

¹⁰⁻¹¹ Imi mia nalé hénihénia qahac imuarunec Anutunéñ Miñ Kewunina Kristo Yesuac qeriaiguc niñareñgéyu heyec imi méndacma degucmi Yesuac hénacoriñ héra neñaocnec Anutuac niñtegitic qinñtegitic hénia hénia imi mewininini kurumeñiguc kua meme uña qac buñaginaguc zéma kuc buñaginaguc ieneñ hénia imi héñtegiticmu niñac imuhuc wañec.

¹² Neñañ imi Yesuac qeriaiguc i ninzéngeña imuacnec mia bac yandi yandi qahac Anutu ho-sucgé mimiawac héna mihicñima kecziñ.

¹³ Imuac zéwelec énécmizua. Onac niñ wamma qenzeñ manzeñ hénia hénia mihicñima kecañzua imuac mia ewagina ménda mamac, néñ niñgic edamuginaguc wammac.

Kiwi yomi olommu ionac niñac wamma zéwelerec.

14 (14a) Hénia imuac niṅac

15 baec kurumeṅiguc ic embac hénia hénia keczu ionac qacgina mihicṅi énécmiyec.*

(14b) Maṅgocnina iwac muru ni simiṅna héimima yomuhuc zéwelec mizua;

16 Inéṅ waṅu, iwac edamuya kuaya qeṅeya séciguc Uṅa téréyanéṅ onac qeri icgina imi kuhanéṅ meseli énécmimac.

17 Meseliyu ninzéṅgéṅic Kristonéṅ onac ewa qeriginaiguc kecénécmiyu eneṅ imi goi héihéi imuac qeriaiguc gété zaligina meyu nammu.

18 Namma seligima météré énécmimia moczoṅ yanda iniguc momacnec Kristoac goi héihéiya imuac hilaṅaya zéma horuaya zéma hiṅṅac hiṅgaraya zéma eṅeṅaya imi séha niṅtegicmu.

19 Waṅu Kristoac siṅ sorocya imi baec ic ionac niniṅ ninanéṅ olommuac séc qahac, waṅu ini imi niṅasarimu niṅac zéwelecanzua. Niṅasarigic Anutuaru qeriawac mériaṅ kuaya qeṅeya hezac iminéṅ onac muru kuaya qesalecgéma hemac zéma zéwelecanzua.

20 Kuha yandanéṅ neṅaṅ muru ai meanzac imuac séciguc, iwawai hénia hénia welec mianziṅ me niṅanziṅ imi ogicma emma wandac wandac medac medac miṅina

21 Anutu iwac muru mia Kristo Yesu zéma iwac héniorṅ héra ionac sugginaiguc edamuyanéṅ hicṅisaiya hicṅisaiya hema emma hemac, hélacnec!

* **3:15:** Ac yomuac hénia imi; Inéṅ momac yanda neṅaṅ Maṅgocnina.

4

Kristoac séwi tasia wamma momacnec ai mewij.

¹ Imuac mia Miñ Kewuninawac wamma hésa ic kekera neñ meme seli ac yomuhuc énézézua; Anutunéñ unuruyu ini iwac buña kecanzu imuac hakagina imi imuac séha wamma kecmu.

² Ewa qerigina memaamuma qeri bénzéniguc zérabéraiguc nalé horuacnec nañselima goi héihéiac qeriaiguc bisiqatén wañamumu.

³ Imuhuc wamma Uña téréyanéñ luaeac hésanéñ dérécgé énécmiyu momacguc wañgic imi mia seliseli wamma qambañtohoya memu.

⁴ Séwiya imi momacguc, Uña téréya imi acguc momacguc, wañu ini imi héihéré énécmimac niñac momacnec niñkinzénégema kecgic unuruyec.

⁵ Miñ Kewunina imi momacguc, wañu ninzén ninzén imi acguc momacguc, wañu doku naec imi acguc momacguc,

⁶ Wañu Anutu acguc momacguc, wañu inéñ mia kekec momac yanda imuac mañgoc keczac. Wañu kekec momac yanda iminéñ méra bawu kecgic momacguc wammu niñac dérécgé énécmima duña imuac sugginaiguc kecanzac.

⁷ Wañu icya icya Kristoac sese séha séc méndacma goinina héima nénécmiyec.

⁸ Imuac mia ac kiwi mén yomuhuc ooyawac hezac; Inéñ ou eñec nalé imuaru hésa ic sasala

dérécgé énécmima onagicma eñec. Emma ic embachéra ionac muru sese énécmiyec.*

⁹ Ou eñec zéyec imuac hénia imi walac baeciguc emu hiñgarec imi mia, néñ hénia ménñ ménda hezac.

¹⁰ Hiñgarec inéñ mia kurumeña kurumeña onogicma eñec i eñeyaoc wanzac. Inéñ iwawai momac yanda imi sécgé énécmimañ zé imuhuc wañec.

¹¹ Wañu inéñ mia tosara Yesuac Méliméli ic, tosara kua meme ic, tosara buña suruc hiabia zéauau ic, tosara pasto, tosara kiwi ic wammu zéma onoporec.

¹² Imi mia ic embachéra téréya mesolañani énécmima welenñ qeçe ai megic toroçe amuma Kristoac séwi ésécñec yacmac niñac imuhuc ai buña qeénécmiyec.

¹³ Neñañ imi Anutuac naña ninzénégéma hénia niñasariwiñ. Imuhuc wannñ ninzénñ ninzénñina zéma niñ asac asarinina iminéñ toroçe nénécmiyu séwi momacguc wamma ic yandi tetecgia wambiñ. Imuhuc wamma Kristoac yandi yandiac séc érérenjiguc yandiwiñ.

¹⁴ Imuhuc wamma neñañ imi deguc muacñec nambérac tanec ménda kechiñ. Ic diwi qiwiliñanéñ ac halécnéñ ala batuc wañ énécmigic ninzénñ ninzénñac ac areñareñgia hénia hénia imuac temboñ temboñanéñ qekenñ qeña wañ énécmiwac niñac.

* **4:8:** Nalé imuaru kawaligina yaréiguc onogicma liliñgéma hama iwawai onagicgic imi ic embachégina gili énécmiñgic. Yesu imi neñañ kawalinina wanzac imuac haka imuaru ac héima zézac.

15 Nén goi héihéiya qeriaiguc ac hélawac zéma wawañ memenina séc orucnina Kristo iwac kekecac séciguc yandiwiñ.

16 Iwarunec séwi tasia imi moczoñ toroya toroya toroqe mimia wañu iwawai hiabia séc qema énécmiyu qéhéréngé amuma séwi tasiawac kuha séc ai mema séwi imi meyandima goi héihéi imuac qeriaiguc miyacgé amuanzac.

Kekec wahala zéma kekec qelia.

17 Imuac niñac ni séwiac hénia imi zéma Miñ Kewunawac qeriaiguc ninzén ninzénna zéau énécmizua; Deguc muacnec imi ic enia eneñ ewa qeriginanéñ iwawai héla qahac imuac wamma kecanzu ésécnec imuhuc ménda wamma kecmu.

18 Ieneñ imi niñasac asari ginanéñ siñidéñgéyu niniñgina qahac imuac suraiguc ewa qeriginanéñ seligiyu Anutuac kekec igucnec waima keñgic.

19 Ieneñ niñtegic qinñtegicgina qahac tanec wamma séwiac siñiguc opocamuma haka biria hénia héniaiwac hémbaoc wamma wañanzu.

20 Ini imi Kristoac hénia imuhuc ménj ménda kuamugic.

21 Ac héla imi Yesuac qeriaiguc hezac éséc ini hélacnec iwac murunec ku énécmiyu niñgiciguc imi

22 ini ala batucac féngéc ic méndacma houma keñanzac ic wahala imuac haka imi séwi usugina ésécnec hetecgému.

23 Ewa qeriginawac uña imi meqeli énécmimia wañu

24 Solaṅ dindiṅa zéma ac hélanéṅ météré énécmiyu Anutuac tanec ic qelia maleku ésécnec héiamuma kecmu.

Kekecac héna ac.

25 Waṅu neṅaṅ momacnec Yesuac séwi tasia wamma kecziṅ imuac niṅac ini ikoc waima ama momac ic iniguc eṅaocnec ac hélacnec zému.

26 Ini qeri biric nimmuiguc késpedes ménda wammu. Waṅu kaiwe kiwa hiṅgacmac imuac séc qeri biric ménda késama kecmu.

27 Biria miṅinawac titiṅa ménṅ ménda waimigic érémac.

28 Kowu nenenéṅ muṅguc kowu ménda nemac, néṅ néwéciguc maqeqeya méra mimacac séc iwawai mihicṅimaṅ zé eṅeya mérianéṅ ai mema haka hiabia wammac.

29 Ac biria imi kuagina igucnec ménda waigic mamac, néṅ ac hiabia ic tosara meyac énécmimacac sécyá zéma acgina ninzu imi onac goi héihéi mihicṅi énécmimu.

30 Ini imi Uṅa téréyawac qeriaiguc asé kiwi menénécmiyu aṅgéṅ titiac nalé ducṅimac imuac séc iwac buṅa kecmu, imuac niṅac Ini Anutuac Uṅa Téréya ewa biri ménda mihicṅi mimu.

31 Ini qeri howuc zéma qeri biric zéma yoṅkanzaṅ zéma wauṅ silac zéma zébiri qébiri haka silic imuhucya imi eṅaṅ muru augic qahac wandacmac.

32 Eṅaocnec goi héihéi waṅamuma wésé ninṅ waṅamuma Anutunéṅ Yesuac qeriaiguc késpedesgina wai énécmiyec éséc késpedesgina waiamumu.

5

¹ Imuac goi héihéi waŋ énécmiyu kecanzu nambérac imuhucya ésécnec Anutuguc kéréndéŋ wamma kecmu.

² Ini imi Kristonéŋ goi héihéi waŋ énécmiyec séciguc eŋaocnec iwawai ménŋ wamma mewinŋ zé goi héihéiyawac qeriaiguc wammu. Kristo inéŋ neŋaŋ niŋac wamma eŋeya kekecy a waima mulu mananŋ héméŋa hiabia ésécnec Anutu héimiyec.

³ Ini imi sugginaiguc kaisero zéma haka biria hénia hénia zéma hémbaoc haka imuhucya imuac qara acguc ménŋ ménda zéhicŋimu. Iminéŋ ic embac météré énécmimia ionac hakagina séha wanzac.

⁴⁻⁵ Kaisero zéma ic qerigina zapi qeŋeya zéma hémbaoc (baniarawac mepé qepési ai) wammu imi eneŋ moczoŋ yanda Kristo zéma Anutuac ama yandaiguc mératéc ménŋ ménda memu. Imi ini niŋyacgéma nindaczu imuac niŋac ac zapi qeŋeya zéma zézoraŋ ac zéma lisi ac imi ménda zému, néŋ nénéwiguc ewa hia ac ézému.

⁶ Ménŋac ménŋ ménda wai énécmigic ac gorosoŋa énézéma ikoc waŋ énécmiwu niŋac. Haka imuhucyawac niŋac Anutuac qeri gericnéŋ ac qeŋe haka imuac nambérac héra ionac muru maanzac.

⁷ Imuac mia ic imuhucya iniguc késayu késa ménda wammu.

⁸ Ini becneŋ imi siŋi tunumaŋac buŋa kecgic, néŋ deguc imi Miŋ Kewuninawac qeriaiguc asac mararaŋac buŋa keczu. Imuac asac mararaŋac nambérac imuac séciguc kecmu.

⁹ Asac mararaṇac héla gocmia imi mia haka hiabia, haka solañə zéma haka héla.

¹⁰ Némacnéṅ Miṅ Kewunina ségiségi mihicṅi mianzac imi batucgé hémma,

¹¹ ini imi siṅi panamaṇac ai iwawai héla qahac imuac ménda toroqemu, néṅ énézégic haka biria héṅteṅicmu.

¹² Ieneṅ sasaṅgiaguc waṅanzu imi kuananéṅ zémanṅ zéwa gamu mamasuṅaguc waṅu réwérizua. ^(14a) Hémbiṅac séc imi moczoṅ asac mararaṅaguc,

¹³ hénia imuac niṅac, iwawai moczoṅ asac mararaṅ néṅ qetagaliju wininianzac imi kicni-nanéṅ hémbiṅac séc waṅanzac.

¹⁴ ^(14b) Imuac ac ménṅ yomuhuc ooyawac hezac; Gaugina hekeczu ini yacgic! ini humuc ic ionac sugina igucnec yacgic! Kristonéṅ qetagalima asari énécmimac.

¹⁵ Imuac ini hakagina dimuhuc wamma kecmu imi niṅteṅicmu. Imuhuc wamma ic embac niṅteṅic qinṅteṅicgina qahac ésécnec qahac, néṅ niṅteṅic qinṅteṅic ginaguc wamma kecmu.

¹⁶ Nalé imi biria yéwériyaguc, imuac niṅac ini nalé imi qaurac ménda qemu.

¹⁷ Imuac bec ini ewa soho ic ménda wammu, néṅ Miṅ Kewuninawac ewa siṅ imi dimuhuc hezac imi niteṅicma kecmu.

¹⁸ Waiṅ doku seliaguc ewa soho ménda wammu. Imi mia kekec soho sohoya. Néṅ Uṅa téréyanéṅ sécgé énécmiyu kecmu.

¹⁹ Mepé qepési legic, zéma ewa hiawac legic, zéma legic téréya eṅaṅ héiamuma ewa qerigiananéṅ Miṅ Kewuninawac muru legic héimima

mepésimimu.

²⁰ Haka hénia hénia hicñi énécmianzac séc Miñ Kewunina Kristo Yesuac qaraiguc nalé séc Anutu mañgocnina ewa hia ac ézému.

²¹ Wañu Kristo ee héihéi wammima enjaocnec méra bacginu kecamumu.

²²⁻²³ Kristonéñ hénarion ionac orucgina wamma eneya séwi wamma keczu ionac añgéh titi ic wanzac ésécnec, embac ménac euyanéh iniña iwac oruha wanzac, imuac niñac embac ini euhécgina ionac méra bacginu kecma Miñ Kewuac muru wammianzu ésécnec wañ énécmimu.

²⁴ Néñ hénarion eneñ Kristoac wammianzu ésécnec embac ini imuhucyanec euhécgina toho-toho wañ énécmima kecmu.

²⁵ Ic ini acguc iniñhécgina ionac goigina héiéncmima Kristonéñ hénarion ionac goigina héi énécmima ionac niñac wamma eneya kekecyá wai énécmiyec imuac séciguc wañ énécmimu.

²⁶ Imi mia dokunéh naec énécmima ackuazécnéh zuac énécmima météré énécmiyec.

²⁷ Imuhuc wañ énécmima eneya kiwaiguc hénarion téréya kumu énécmima métac métac me kiric misicya qahac téréyanec solañanec wammu niñac imuhuc wañ nénécmiyec.

²⁸⁻³⁰ (30) Neñañ imi Kristoac séwi tasia kecziñ imuac niñac, ⁽²⁹⁾ Kristonéñ hénarion héra galengé nénécmianzac. Ic ménéñ mén eneya séwiya niñac mézé titi ménda wañamuma nalé séc nene gumu amuma kecanzac. ⁽²⁸⁾ Imuac ic ini imuhucyanec enañ iniñhécgina imi enañ séwigina

ésécnec goigina héi énécmimu. Ic ménénén mén inin̄a goiya héimianzac inén imi eneya séwiya goiya héiamuanzac tacnec wanzac.

³¹ Hénia imuac nin̄ac ic ménénén nen̄goc man̄gocya wai érécmima kemma eneya inin̄aguc toroqema séwi éréhécnén séwi momacguc wammaoc imuhuc zéyu ooyawac hezac.

³² Wan̄u imuac hénia san̄a imi qeu hin̄gac hin̄gara. Ni imi Kristo zéma Anutuac hénar̄in̄ ionac nin̄ac momacnec imuhuc zézua.

³³ Wan̄u ini imuhucyanec en̄ac en̄ac en̄an̄ inin̄hécgina imi en̄an̄ ésécnec goigina héi énécmimu. Wan̄u embac ini acguc euhécgina onac eegina héi énécmimu.

6

Nambérac zéma nen̄goc man̄goc.

¹ Nambérac ini Min̄ Kewuninawac qeriaiguc nen̄goc man̄goc hécgina nin̄toho wan̄ énécmimu. Haka iminén̄ haka dindin̄a wanzac.

² Gen̄ga nen̄goc man̄gocga eegira héi érécmiwéséman̄ iminén̄ mia hén̄a ac walac walac zikiziki acyaguc wanzac.

³ Imuhuc wambéséman̄iguc gi imi baeciguc nalé horua kekecgaguc kecbéséman̄.

⁴ Man̄goc ini nambérac hécgina qeri geric ménda mihic̄ni énécmimu, nén̄ Min̄ Kewuninawac paken̄ ac zéma zézé seli acnén̄ qegumu énécmimu.

Welen̄ qeqe ic zéma ionac min̄ man̄gocgina.

⁵ Welen̄ qeqe ini imi bac yandi yandi wamma zénén̄gina hiriyu ewa qerigina hélánén̄

séwiginawac miñ kewu hécgina imi Kristoac muru wammianzu éséc nec welen qeénécmimu.

⁶ Ionac kicginaiguc baec ic ionac ewa qerigina mehiaru énécmianzu éséc qahac, néñ Kirisistoac welen qeçe ic éséc nec ewa qeriginanéñ Anutuac ewa siñ niñtoho wamma

⁷ siña nimma welen qeénécmima ic ionac wañanzu éséc nec qahac, néñ Miñ Kewuninawac wammianzu éséc nec welen qeénécmimu.

⁸ Imi mia icya icya haka hiabia ménjac mén wammuiguc welen qeçe me miñ mañgoc kekera séc ai imi Miñ Kewuninanéñ nénécmiyu meanziñ imuhuc zéma nimma imuhuc wañ énécmimu.

⁹ Imuac Galen ini acguc welen qeçe hécgina imuhucyanec wañ énécmimu, néñ ménda tericgé énécmimu. Némac niñ ionac zéma onac Miñ Kewugina imi ou kurumeniguc kecanzac. Wañu iwac muru imi séwiac hémma niñgésigési mén ménda hezac imuac mia imuhuc wammu.

Anutuac yaréac maleku selia.

¹⁰ Tetecgiaiguc yomuhuc zéwa niñgic; Ini imi Miñ Kewuninawac qeriaiguc zéma iwac kuc buñawac kuhanéñ meseli amumu.

¹¹ Ini imi Biria miñinawac ikoc imi qewiñ zé Anutuac bunda maleku héigic séwiginina moczoñ hoturudacmac.

¹² Neñañ yaré imi ic séwi busuninaguc me sacninaguc qahac, néñ Biria miñinawac kewuya kewuya zéma kuc buña zéma baec siñi tunumañaguc imuac galenhéra zéma sawaiguc uña biria iniguc wañanzin.

13 Imuac Anutuac bunda maleku héigic séwigina moczoŋ hoturu énécmiyu nalé biriaiguc ini efima yaré qemaguc naŋselimu niŋac imuhuc wammu.

14 Imuac ini naŋselima ac hélanéŋ rikuŋgina mema zikigic haka solanjanéŋ tétécginaiguc hoturumu.

15 Waŋu héna usugina luaeac buŋa suruc hiabi-anéŋ haima zéréŋqéréŋ waŋamumu.

16 Imuac qahaiguc toroqema ninzéŋ ninzéŋac saiwa mema iminéŋ ic biriawac zakonŋ geric bélanaguc imi hézégéma qéwécgému.

17 Aŋgéŋ titiac opoc selia zéma Uŋa téréyawac sou Anutuac ackuazéc imi memu.

18 Waŋu zéwelecgina zéma zéqaaqacgina moczoŋ néŋ naléya qahac Uŋa téréyawac qeriaiguc zéwelecmu. Imuhuc wambiŋ zé zenzeŋ qeli qeli wamma nalé séc seliseli wamma zéwelecmu. Waŋu ic embac téréya ionac niŋ wamma zéwelecmu.

19 Waŋu nuac niŋac momacnec zéwelecmu nuac muru ackuazéc néŋu kuana aŋgéma buŋa suruc hiabia imuac hénia saŋa imi porinŋ qahac zéau énécmimaŋ niŋac zéwelec wammu.

20 Neŋ ai imuac mia Yesunéŋ méli néŋu hésa ic wamma keczua. Waŋu imi mia neŋ ac zémaŋac hezac imi porinŋ qahac selianec énézémaŋ niŋac imuhuc mihiçŋi néŋec.

Mozoc ac.

21 Kekecnawac hénia me némac ai mema keczua imi onac momacnec énézéwa nimmu niŋac ninzéŋ ninzéŋac dacmuna zéma Miŋ

Kewuninawac qeriaiguc ai ichéla keczac Tikiko inéŋ mia héniana imi moczoŋ énézédacmac.

²² Inéŋ mia nonac kekecninawac hénia énézéma ewa qerigina meefi énécmimac niŋac ni ic imi ai imuac téŋgéŋ méli énécmizua.

²³ Anutu maŋgocnina zéma Miŋ Kewunina Kristo Yesuac murunec goi héihéiya luaeguc zéma ninzéŋ ninzéŋaguc iminéŋ dacmuna hécna onac muru hemac.

²⁴ Miŋ Kewunina Kristo Yesu siŋa ménda humu-mia nimmianzu séc ionacmuru ewa hiayanéŋ he énécmimac.

SISIPAC AC QELIA
The New Testament and Psalms in the Kube Language
of Papua New Guinea
Buk Song na Nupela Testamen long tokples Kube long
Niugini

copyright © 2012 Global Bible Translators

Language: Mongi (Kube)

Translation by: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-23

PDF generated using Haiola and XeLaTeX on 18 Apr 2025 from source files dated 31 Aug 2023

0403b50f-078d-52e2-a203-056e8a430665